



Broj: 04-04-4-2015/24
Sarajevo, 20. 6. 2024. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA 'EFIKASNOST
DRUGOSTEPENIH ORGANA U POSTUPANJU PO ŽALBAMA'“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Efikasnost drugostepenih organa u postupanju po žalbama“, objavljenog u aprilu 2022. godine. Cilj je bio ispitati preduzete aktivnosti i procijeniti u kojoj mjeri su realizovane date preporuke.

Praćenje je obuhvatilo aktivnosti Federalnog ministarstva finansija, Federalnog ministarstva za pitanja boraca i invalida odbrambeno-oslobodilačkog rata i Federalnog ministarstva pravde preduzete u periodu 2022–2023. godine, na realizaciji ukupno dvanaest preporuka.

Rezultati praćenja pokazuju da, iako su preduzete određene aktivnosti na unapređenju efikasnosti rješavanja po žalbama, **većina preporuka nije u potpunosti realizovana, što je rezultiralo time da i dalje postoje kašnjenja u rješavanju žalbi, kao i veliki broj neriješenih žalbi iz prethodnih godina.**

Federalno ministarstvo finansija je od devet preporuka koje su mu date u potpunosti realizovalo tri. Federalno ministarstvo za pitanja boraca i invalida odbrambeno oslobodilačkog rata je od sedam preporuka realizovalo dvije, dok Federalno ministarstvo pravde nije u potpunosti realizovalo nijednu od tri preporuke koje su mu date.

Preduzete su aktivnosti na stvaranju osnovnih pretpostavki za efikasnije rješavanje po žalbama, uključujući uspostavu internih procedura i nadzora, vođenje potrebnih evidencija te rješavanje kadrovskih problema.

Zbog velikog broja predmeta iz ranijih godina još uvijek nije osigurano rješavanje po žalbama u propisanom roku. **Federalno ministarstvo finansija je u periodu 2021–2023. godine samo tri žalbe riješilo u zakonskom roku, dok je 3.397 riješilo izvan zakonskog roka. Federalno ministarstvo za pitanja boraca i invalida odbrambeno-oslobodilačkog rata je 355 žalbi riješilo u zakonskom roku, dok je 3.161 riješilo izvan zakonskog roka.**

Uprkos izraženim problemima u predmetnoj oblasti, Federalno ministarstvo pravde nije vršilo analizu Zakona o upravnom postupku i predlagalo izmjene kako bi se omogućilo brže i efikasnije rješavanje upravnih stvari.

Uzimajući u obzir činjenicu da neblagovremeno rješavanje žalbi iz nadležnosti Federalnog ministarstva finansija može imati negativne posljedice na Budžet Federacije BiH, te da kašnjenje u pogledu rješavanja žalbi iz nadležnosti Federalnog ministarstva za pitanja boraca i invalida odbrambeno-oslobodilačkog rata može uticati na egzistencijalna prava osjetljive društvene kategorije, Ured za reviziju cijeni da nadležna ministarstva trebaju preduzeti dodatne aktivnosti kako bi se realizovale date preporuke.



GENERALNI REVIZOR
DŽEVAD NEKIĆ